

Այս դասի (մոտիվացնող ներածական տեսանյութ+ դասի տեքստ+ բառարան+ինքնաստուգիչ հարցեր) յուրացման համար հարկավոր է մինչև 4 ժամ:

ԴԱՍ 5

ԱԶԱՏՈՒԹՅՈՒՆԻՑ ԶՐԿԵԼՈՒ ՀԵՏ ԿԱՊՎԱԾ ՊԱՏԺԱՏԵՍԱԿՆԵՐԻ ԵՎ ՔՐԵԱԻՐԱՎԱԿԱՆ ՆԵՐԳՈՐԾՈՒԹՅԱՆ ԱՅԼ ՄԻՋՈՑՆԵՐԻ ԿԻՐԱՌՈՒՄԸ ԱՆՉԱՓԱՀԱՄՆԵՐԻ ՆԿԱՏՄԱՄԲ: ԱՆՉԱՓԱՀԱՄՆԵՐԻ ՀԱՄԱՐ ՆԱԽԱՏԵՍՎԱԾ ՔՐԵԱԿԱՏԱՐՈՂԱԿԱՆ ՀԻՄՆԱՐԿԸ ԵՎ ՀԱՄԱՅՆՔԱՅԻՆ ԿԱՆԽԱՐԳԵԼԻՉ ԾՐԱԳՐԵՐԸ

Ցուցումներ

ՄՈՏԻՎԱՑՆՈՂ ՆԵՐԱԾԱԿԱՆ ՏԵՍԱՆՅՈՒԹ (Հասանելի է Արդարադատության ակադեմիայի կայքի հեռուստուցման բաժնում և հեռուստուցման փաթեթի կրիչում)



Մինչև 5 րոպե

«Ճ դատարանների կողմից արդարադատության իրականացման գործընթացում առավել վիճահարույց հարցը ազատությունից զրկելու հետ կապված պատժատեսակների, քրեաիրավական ներգործության այլ տեսակների, խափանման միջոցների կիրառումն է, հատկապես երբ խոսքը վերաբերում է երեխային:

Ուշադրությամբ կարդացե՛ք տեքստը (օգտվելով բառարանից) և այն յուրացնելուց հետո միայն անցե՛ք հաջորդ մասերին /ինքնաստուգիչ հարցեր, առաջադրանք/:

Երեխային ազատությունից զրկելու հիմքերն ու պայմանները նախատեսված են Մարդու իրավունքների և



Մինչև 180 րոպե

հիմնարար ազատությունների մասին կոնվենցիայի [4] հոդված 5-ում, որի մեկնաբանությունից բխում է, որ անչափահասին ազատությունից կարելի է զրկել ազատագրկման հետ կապված պատժատեսակների (ազատագրկում, կալանք) կամ քրեաիրավական ներգործության միջոցների դատապարտելիս, դաստիարակչական հսկողության, վարակիչ հիվանդությունների տարածումը կանխելու նպատակներով, մինչ դատավճռի կայացումը՝ ձերբակալում կամ կալանավորում իրականացնելիս, երեխայի անօրինական մուտքը երկիր կանխելու, երեխային այլ պետության հանձնելու կամ արտաքսելու նպատակով ձերբակալելիս կամ կալանավորելիս: Նաև ազատությունից կարելի է զրկել հոգեկան հիվանդներին, ալկոհոլիկներին, թմրամոլներին, թափառաշրջիկներին: Երեխայի իրավունքների մասին կոնվենցիայի հոդված 37-ի (բ) կետը սահմանում է, որ «Երեխայի ձերբակալությունը, կալանքը կամ ազատագրկումն իրականացվում են համաձայն օրենքի և գործադրվում են միայն որպես ծայրահեղ միջոց և, որքան հնարավոր է, կարճ ժամանակամիջոցով»: Այս առումով առավել մանրամասն կանոնակարգումներ պարունակում է Պեկինյան կանոնների [7] կետ 17.1-ը, որը սահմանում է, որ «...բ) անչափահասի անձնական ազատության սահմանափակման մասին որոշումը պետք է ընդունվի միայն հարցի մանրագնի քննարկումից հետո, և սահմանափակումը պետք է հասցնել հնարավոր նվազագույնի, գ) անչափահաս իրավախախտին պետք չէ զրկել ազատությունից, եթե միայն նա մեղավոր չի ճանաչվում այլ անձի դեմ բռնությամբ լուրջ արարք գործելու կամ լուրջ իրավախախտումներ բազմիցս կատարելու համար, և եթե առկա չէ արձագանքման այլ համապատասխան միջոցը...»: Նույն կանոնների կետ 13.1-ը նախատեսում է, որ «մինչդատական կալանքը պետք է կիրառվի միայն որպես ծայրահեղ միջոց և ամենակարճ ժամկետով»: Բանգլոկյան կանոնների 65-րդ կանոնը հատուկ դրույթ է պարունակում

իգական սեռի անչափահասների նկատմամբ արդարադատություն իրականացնելիս՝ ազատությունից զրկելու հետ կապված ներգործության միջոցների կիրառման առումով, սահմանելով, որ «...առավելագույնս պետք է խուսափել օրենքի հետ կոնֆլիկտի մեջ գտնվող երեխաներին քրեակատարողական հիմնարկներ տեղավորելուց: Որոշում կայացնելիս հաշվի է առնվում իգական սեռի անչափահաս իրավախախտների՝ գենդերային գործոններով պայմանավորված խոցելիությունը...»: ԵՍ նախարարների կոմիտեի՝ կալանքի տակ պահելու, կալանքի տակ պահելու պայմանների և չարաշահումից պաշտպանված լինելու երաշխիքների տրամադրման վերաբերյալ 2006 (13) հանձնարարականի [11] կետ 3-ը սահմանում է, որ կալանքի կիրառումը, հատկապես նախնական քննության փուլում, պետք է լինի բացառություն, այլ ոչ թե նորմ:

Ներկայացված դրույթներից հետևում է, որ անչափահասին ազատությունից զրկել հնարավոր է միայն որպես ծայրահեղ միջոց, այսինքն՝ երբ համաչափ արձագանքման այլ միջոցներ չկան: Ընդ որում՝ դա հնարավոր է հետևյալ դեպքերում՝

Բերեք օրինակ:

ա) մինչդատական փուլում՝ ազատությունից զրկելու հետ կապված խափանման միջոց կիրառելիս,

բ) անչափահասին ազատությունից զրկելու հետ կապված պատժի կամ քրեաիրավական ներգործության այլ տեսակի դատապարտելիս՝ պայմանով, որ նա մեղավոր է ճանաչվել այլ անձի նկատմամբ բռնություն գործադրելով լուրջ արարք գործելու մեջ,

գ) անչափահասին ազատությունից զրկելու հետ կապված

պատժի կամ քրեաիրավական ներգործության այլ տեսակի դատապարտելիս՝ պայմանով, որ նա մեղավոր է ճանաչվել լուրջ իրավախախտումներ բազմիցս գործելու մեջ:

Թեև Պեկինյան կանոնները չեն հստակեցնում, թե ինչ պետք է հասկանալ «լուրջ արարք», «լուրջ իրավախախտում» հասկացությունների ներքո, սակայն դժվար է պատկերացնել, որ, օրինակ, ոչ մեծ ծանրության հանցագործությունները կարող են ընդգրկվել այդ հասկացությունների ներքո:

Փորձե՛ք ինքնուրույն որոշարկել հասկացությունները:

Գործող քրեական օրենսգիրքը առանձնահատուկ կարգավորում է անչափահասների նկատմամբ կիրառման ենթակա պատժի համակարգը, որը ներառում է տուգանք, հանրային աշխատանքներ, կալանք և ազատազրկում: Վերջին երկուսը հանդիսանում են անչափահասին ազատությունից զրկելու հետ կապված պատժատեսակներ:

«Քրեական օրենսգրքի [1] հոդված 88-ի համաձայն՝ կալանք պատժատեսակը կարող է կիրառվել դատավճռի կայացման պահին 16 տարին լրացած անչափահասի նկատմամբ՝ 15 օրից 2 ամիս ժամկետով: Ընդ որում՝ «Քրեական օրենսգրքի հոդված 57-ի մեկնաբանությունից հետևում է, որ կալանքը կարող է նշանակվել ոչ մեծ և միջին ծանրության հանցագործությունների համար: Անչափահասի նկատմամբ կալանք պատժատեսակի կիրառումը նման կանոնակարգումների պարագայում խնդրահարույց է, քանի որ հակադրվում է Պեկինյան կանոնների պահանջներին. ոչ մեծ ծանրության հանցագործությունը դժվար է դիտարկել որպես Պեկինյան կանոններում նշված «լուրջ իրավախախտում», որի բազմիցս կատարման համար կամ այն բռնությամբ զուգորդելու դեպքում նշանակվի ազատությունից զրկելու հետ կապված պատիժ:

ՀՀ քրեական օրենսգրքի հոդված 89-ի համաձայն՝ ազատազրկումն անչափահասների նկատմամբ նշանակվում է ոչ մեծ ծանրության հանցագործության համար առավելագույնը 1, միջին ծանրության հանցագործության համար՝ առավելագույնը 3, մինչև 16 տարին լրանալը կատարած ծանր կամ առանձնապես ծանր հանցանքի համար՝ առավելագույնը 7, 16-ից մինչև 18 տարին լրանալը կատարած ծանր կամ առանձնապես ծանր հանցանքի համար՝ առավելագույնը 10 տարի ժամկետով: Նույն օրենսգրքի հոդված 90-ի համաձայն՝ մինչև 16 տարին լրանալը միջին ծանրության, ծանր կամ առանձնապես ծանր հանցանք կատարած անձանց նկատմամբ ազատազրկումը, ըստ հանցագործությունների համակցության, չի կարող գերազանցել 7, 16-ից մինչև 18 տարեկանների համար՝ 10 տարին: Ըստ դատավճիռների համակցության՝ ազատազրկման ձևով նշանակվող վերջնական պատիժը չի կարող գերազանցել 12 տարին: Օրենսդիրը հնարավոր է համարում ազատազրկում պատժատեսակի կիրառումը ոչ մեծ ծանրության հանցանք կատարած անչափահասի նկատմամբ, ինչը, ինչպես և կալանքի դեպքում, հանդիսանում է Պեկինյան կանոններից շեղում:

Ինչ վերաբերում է քրեադատավարական օրենսդրության շրջանակներում կիրառվող ձերբակալմանը, կալանավորմանը, ինչպես նաև բժշկական կամ դաստիարակչական հաստատությունում անձին հարկադրաբար տեղավորելուն, ապա ՀՀ քրեական դատավարության օրենսգրքի [2] հոդված 11-ի համաձայն՝ այն թույլատրվում է միայն դատարանի որոշմամբ: Մինչև դատարանի համապատասխան որոշումն ստանալը անձը չի կարող ձերբակալման հետևանքով անազատության մեջ պահվել 72 ժամից ավելի: Յուրաքանչյուր ձերբակալվածի և կալանավորվածի անհապաղ հաղորդվում են ձերբակալության կամ կալանավորման հիմքերը, ինչպես նաև

այն հանցագործության փաստական հանգամանքները և իրավաբանական որակումը, որի կատարման մեջ նա կասկածվում կամ մեղադրվում է: Դատարանը, ինչպես նաև հետաքննության մարմինը, քննիչը և դատախազը պարտավոր են անհապաղ ազատ արձակել անազատության մեջ ապօրինի պահվող յուրաքանչյուր անձի:

Անչափահասին ձերբակալելիս և կալանավորելիս գործում են նույն հիմքերն ու պայմանները, ինչ որ չափահասի դեպքում: Օրենսդիրը սահմանում է, որ կալանավորումը կարող է կիրառվել միայն մեղադրյալի նկատմամբ և նման որոշում կայացնելու հետ միաժամանակ դատարանը լուծում է մեղադրյալին կալանքից գրավով ազատելու հնարավորության հարցը: Մինչդեռ Պեկինյան կանոնների կետ 13.2-ը սահմանում է, որ կալանավորումը հնարավորինս պետք է փոխարինվի այլընտրանքային միջոցներով, ինչպիսիք են՝ հետևողական հսկողությունը, դաստիարակչական ակտիվ աշխատանքը կամ դաստիարակչական հաստատությունում տեղավորելը, իր կամ այլ ընտանիքի խնամքին ու հսկողությանը հանձնելը: ՀՀ քրեական դատավարության օրենսգրքի հոդված 442-ով անչափահասների հանդեպ կալանավորման միայն մեկ առանձնահատկություն է սահմանված, որ այն թույլատրելի է միայն այն դեպքում, երբ երեխային վերագրվում է միջին ծանրության, ծանր կամ առանձնապես ծանր հանցանքի կատարում: Ինչ վերաբերում է կալանավորման տևողությանը, ապա այս առումով որևէ առանձնահատկություն սահմանված չէ. մինչդաստական վարույթում դրա տևողությունը չպետք է գերազանցի 12 ամիսը, իսկ դատական քննության առումով սահմանափակում առկա չէ: Նման մոտեցումը չի բխում անչափահասների գործերով արդարադատության իրականացման միջազգային իրավական նորմերի պահանջներից, որոնք նշում են, որ տարբերակված մոտեցում

Փորձե՛ք առանձնացնել Հայաստանում այլընտրանքային միջոցների կիրառմանը նպաստող և խոչընդոտող գործոնները:

պետք է լինի չափահասների և անչափահասների նկատմամբ:

Պեկինյան կանոնների կետ 13.5-ի համաձայն՝ թե՛ նախնական, թե՛ դատական քննության, թե՛ դատավճռի կայացմանը հետևող ժամանակահատվածում յուրաքանչյուր երեխայի համար պետք է ապահովվի նրա խնամքը, պաշտպանությունը (այդ թվում՝ իրավաբանական), անհրաժեշտ անհատական սոցիալական, հոգեբանական, բժշկական, ֆիզիկական օգնությունը, ինչպես նաև կրթության, պրոֆեսիոնալ պատրաստության ասպարեզներում օգնությունը, որոնք կարող են պահանջվել՝ երեխայի տարիքը, սեռը և անձը նկատի առնելով: Մինչդեռ կալանքի կիրառման դեպքում ՀՀ-ում ներկայումս հնարավոր չէ ապահովել երեխաների կրթության իրավունքը:

Քրեակատարողական հիմնարկներում երեխաների պահվելուն ներկայացվող պահանջները սահմանվում են ինչպես ՀՀ օրենսդրությամբ, այնպես էլ մի շարք միջազգային ակտերով՝ Բանտարկյալների հետ վարվեցողության նվազագույն ստանդարտ կանոններով [6], Բանգկոկյան կանոններով [9], Եվրոպայի խորհրդի նախարարների կոմիտեի թիվ Rec (2006) 2 հանձնարարականով՝ Եվրոպական բանտային կանոնների վերաբերյալ [8] և այլն: Այդ հարցերը առավելագույն մանրամասնությամբ ներկայացված են Հավանայի կանոններում [10]: ՀՀ քրեակատարողական օրենսգրքում արտացոլված է անչափահասներին չափահասներից անջատ պահելու պահանջը, սակայն դա գործնականում հնարավոր չէ իրականացնել, օրինակ, իգական սեռի անչափահաս դատապարտյալների պարագայում: Մինչդեռ «Երեխայի իրավունքների մասին» կոնվենցիան [5] սահմանում է, որ «...ազատությունից զրկված յուրաքանչյուր երեխա պետք է առանձնացվի մեծահասակներից, եթե միայն

չի համարվում, որ երեխայի լավագույն շահերից ելնելով՝ հարկավոր չէ այդ անել և պետք է իրավունք ունենա կապ պահպանել իր ընտանիքի հետ նամակագրության և տեսակցությունների միջոցով՝ բացառությամբ հատուկ հանգամանքների»։ Այս կանոնի խախտում ՄԻԵԴ-ը արձանագրել է Գյուվեքը ընդդեմ Թուրքիայի (Güveç v. Turkey) [13] և Նարթը ընդդեմ Թուրքիայի (Nart v Turkey) [12] գործերով, երբ հանցագործության մեջ կասկածվող անչափահասները մինչդատական փուլում կալանքի ժամկետը ստիպված են եղել անցկացնել չափահասների հետ:

«Ը քրեական արդարադատության համակարգում երեխաների նկատմամբ ազատությունից զրկելու հետ կապված պատժատեսակները, ինչպես նաև կալանավորումը, ապահովվում են «Աբովյան» քրեակատարողական հիմնարկի շրջանակներում, որում նախատեսված է մեկուսացման երկու աստիճան՝ *բաց* և *կիսաբաց*: Այդտեղ է ապահովվում ազատությունից զրկելու հետ կապված պատժատեսակների դատապարտված արական սեռի անչափահաս դատապարտյալների պատժի իրականացումը: Մեկուսացման առավել բարձր աստիճան է ապահովվում այն անչափահասների համար, որոնց նկատմամբ կիրառվել է կալանք:

Առանձին հետաքրքրություն են ներկայացնում համայնքային կանխարգելիչ-վերականգնողական տարաբնույթ ծրագրերը, որոնք նպատակաուղղված են ազատագրկման հետ կապված պատժատեսակների դատապարտված երեխաների վերաինտեգրմանը հասարակությունում: Միջազգային պրակտիկայում դրանց թվին են դասվում **պրոբացիան** (պատիժը պայմանականորեն չկիրառելը), պատժից պայմանական-վաղաժամկետ ազատվելը, աշխատանքի կամ ուսման նպատակով քրեակատարողական հիմնարկից դուրս

գալը, արձակուրդը, այսպես կոչված «**halfway house**» ծրագրերը, որոնք ուղղված են ազատությունից զրկված անձի վերաինտեգրմանը հասարակությունում: Նշված ծրագրերի մի մասը, թեկուզ և այլ անվանումով և կանոնակարգմամբ, իրականացվում է նաև ՀՀ-ում: Օրինակ՝ ՀՀ քրեակատարողական օրենսգրքի [3] հոդված 80-ը սահմանում է կարճաժամկետ մեկնման հնարավորություն՝ սոցիալական վերականգնման նպատակով, հոդված 114-ը՝ պատժից պայմանական վաղաժամկետ ազատելու պայմանները: ՀՀ-ում առավել տարածում ունեն անչափահասների հանցավորությունը կանխարգելելուն ուղղված ռիսկային կամ ոչ մեծ ծանրության իրավախախտում կատարած երեխաների հետ վերականգնողական աշխատանք իրականացնող համայնքային-վերականգնողական կենտրոնները (ՀՎԿ): Նախատեսվում է, որ ՀՀ պրոբացիոն ծառայությունը ևս ակտիվ ներդրում կունենա այս գործընթացում:

Այս դասի շրջանակներում քննարկեցինք

- անչափահասների նկատմամբ ազատությունից զրկելու հետ կապված քրեաիրավական ներգործության միջոցների նշանակման և կիրառման պայմանները,
- քրեակատարողական հիմնարկին ներկայացվող պահանջները,

ընդհանուր պատկերացում տվեցինք

- հանցանք կատարած երեխայի վերասոցիալականացմանն ուղղված համայնքային կանխարգելիչ ծրագրերի մասին:

Անչափահասին ազատությունից զրկելու հետ չկապված պատժատեսակների ու խափանման միջոցների կիրառության հիմնախնդիրները կքննարկենք հաջորդ դասի շրջանակներում:

Նշումների համար`

.....

.....

.....

.....

.....

.....

.....

.....

.....

.....

.....

.....

.....

.....

.....

.....

.....

.....

.....

.....

.....

.....



Ցուցումներ

Ուշադրությամբ ծանոթացե՛ք տերմիններին, իսկ դասի տեքստի յուրացման հետ կապված դժվարությունների դեպքում կրկին անդրադարձե՛ք դրանց:

Վերախնտեգրում – Միջոցառումների համալիր՝ ուղղված անձի խախտված կամ կորցրած հասարակական կապերի և հարաբերությունների վերականգնմանը, ինչը թույլ կտա անձին առանց կոնֆլիկտների ապրել սոցիալական միջավայրում և հարաբերվել այլ անձանց հետ, զերծ մնալ հանցավոր վարքագծի դրսևորումից:

Վերասոցիալականացում – Իրավական, կազմակերպական և սոցիալ-հոգեբանական միջոցառումների իրականացման գործընթաց՝ ուղղված իրավախախտում կատարած անձի արժեքային կողմնորոշումների, վարքագծի նորմերի, մոդելների՝ հասարակության կողմից ընդունելի տարբերակների վերափոխմանը:



Մինչև 25 րոպե

Վերականգնողական ծրագիր – Պետական կամ հասարակական կազմակերպությունների կողմից իրականացվող ծրագրեր (օրինակ՝ կրթական, հոգեբանական աջակցության)՝ ուղղված իրավախախտում կատարած անձի վերասոցիալականացմանը, վերախնտեգրմանը, դրական ներանձնային փոփոխությունների խթանմանը, ինչն էլ նվազեցնում է հանցավոր վարքագիծ դրսևորելու հավանականությունը:

Այլընտրանքային միջոցներ – Ազատագրկմանն այլընտրանք հանդիսացող պատժատեսակներ (օրինակ՝ տուգանք, հանրային աշխատանքներ) կամ քրեաիրավական ներգործության այլ միջոցներ (օրինակ՝ դաստիարակչական բնույթի հարկադրանքի միջոցներ) կամ արձագանքման այլ միջոցներ (օրինակ՝ մեդիացիա կիրառելը, պատիժը պայ-

մանականորեն չկիրառելը և փորձաշրջան սահմանելը):

Երեխայի լավագույն շահ – Երեխայի իրավունքների երաշխավորման սկզբունք, որի առանցքում նրա բարեկեցության ապահովումն է՝ նպատակ հետապնդելով առավելագույնս երաշխավորել երեխայի անվտանգությունը, ինչպես նաև նրա առաջնահերթ կարիքների բավարարումն ու խնամքը: Երեխայի լավագույն շահը որոշվում է յուրաքանչյուր կոնկրետ դեպքով՝ հաշվի առնելով այնպիսի գործոններ, ինչպիսիք են՝ երեխայի տարիքը, նրա հասունության մակարդակը, մտավոր և ֆիզիկական կարիքները, այդ կարիքների բավարարման համար համապատասխան խնամքի հնարավորությունը, ծնողների ներկայությունը կամ բացակայությունը, նրանց հետ հուզական կապը, երեխայի զարգացման համար ծնողի/ների, ընտանիքի անդամների հետ անվտանգ պայմաններում շփվելու կարևորությունը, երեխայի սոցիալական շփումը (դպրոց, ընկերներ, մասնակցություն մշակութային կյանքին, սոցիալ-մշակութային խմբակներին և այլն), ինչպես նաև երեխայի մշակութային, լեզվական, հոգևոր, կրոնական կապերը:

Ռիսկային անչափահաս – Երեխա, ով գտնվում է այնպիսի գործոնների ազդեցության տակ, որոնք բարձրացնում են իրավախախտ (դելինկվենտ) կամ շեղվող վարքագիծ դրսևորելու նրա հակվածությունը:

Օրենքի հետ կոնֆլիկտի մեջ գտնվող երեխա – 18 տարին չլրացած անձ, ով առնչվում է արդարադատության համակարգի հետ՝ հանցանք կատարած լինելու կասկածի կամ մեղադրանքի առկայու-

թյան պարագայում:

Պրոբացիա – Սոցիալ-հոգեբանական ծառայությունների համակարգ՝ ուղղված հանցանք կատարած անձի վերաինտեգրմանը, վերասոցիալականացմանը, նրա կողմից նոր հանցանքների կանխմանը, ինչպես նաև հանրային անվտանգության ապահովմանը: Այն իրականացվում է հանցանք կատարած անձի նկատմամբ այլընտրանքային խափանման միջոցների, ազատությունից զրկելու հետ չկապված պատիժների, անվտանգության միջոցների կիրառման, պատիժը պայմանականորեն չկիրառելու, պատժից պայմանական վաղաժամկետ ազատելու, պատժի կրումից ազատելու կամ պատժի կրումը հետաձգելու ընթացքում հսկողություն, ուղղորդում և աջակցություն իրականացնելու միջոցով:

Պրոբացիոն ծառայություն – Պրոբացիա իրականացնող պետական իրավասու մարմին:

(Halfway house) – կացարանային տիպի կենտրոն՝ նպատակաուղղված դատապարտյալների վերաինտեգրմանը հասարակությունում, այդ թվում՝ նրանց նոր մասնագիտական հմտություններ սովորեցնելով, հոգեբանական օգնություն կամ այլ օժանդակություն տրամադրելով: